

Morning Dogri (NSD) Bulletin 19-05-2025

आकाशवाणी

1. सेना नै साफ कीता ऐ जे कल पाकिस्तान कन्नै डी.जी.एम.ओ सतह दी गल्लबात दी कोई योजना नेई ही ते 12 मई दी गल्लबात दौरान तैह कीते गेदे संघर्ष विराम गी जारी रखने दी कोई मयाद तैह नेई ऐ।
2. इसरो नै पी.एल.एल.वी राकेट आसेआ उपग्रैह आई.ओ.एस-09 गी कक्षा च स्थापित नेई करी सकने दी घटना दी जांच लेई इक समिति खडेरी दी ऐ।
3. मौसम विभाग नै अगले 5एं दिनें दौरान केरल, कर्नाटक, कोंकरण, गोवा ते महाराष्ट्र च तेज बरखा दे असार दस्से न।
4. एन.सी.सी दे अभियान दल नै दुनिया दी सब्बनें शा उच्ची प्हाड़ी किंगर माउंट एवरेस्ट पर कामयाबी कन्नै चढ़ाई करियै इक महत्वपूर्ण उपलब्धि हासल कीती ऐ।
5. अमरीका दे राष्ट्रपति डोनाल्ड ट्रम्प होर रूस ते यूक्रेन बश्कार युद्ध गी खत्म करने दे प्रयास च रूस दे राष्ट्रपति यूक्रेन दे राष्ट्रपति ते कई नाटो मुखें दे लीडरें कन्नै बक्ख-बक्ख गल्लबात करंगन।

6. I.P.L क्रिकेट च गुजरात टाइटन्स नै दिल्ली कैपिटल्स गी 10एं विकटें कन्नै हराई दिता। अज्ज लखनऊ सुपरजायंट्स दा मुकाबला सनराइजर्स हैदराबाद कन्नै होग।

7. SAAF-Under 19 Fotball प्रतियोगिता च भारत नै panely shootout बंगलादेश गी 4-3 कन्नै हराइयै खिताब जिती लैता ऐ।

<><><><><><>

Army-Ceasefire

भारती फौजै, भारत ते पाकिस्तान बश्कार कल संघर्ष विराम खत्म होई जाने दे दावे आहले रिपोर्टें गी सिरे थमां खारिज करी दिता। इस मामले च स्पष्टीकरण दिंदे होई फौज नै आखेआ ऐ जे जंदे रोज भारत ते पाकिस्तान दे फौजी कार्रवाईएं सरबंधी महानिदेशकें यानि डीजीएमओ स्तर पर गल्लबात दा कोई कार्यक्रम नेई ऐ हा। फौज नै इब्बी आखेआ ऐ जे जंदी 12 मई गी दौनें मुल्खें दे डीजीएमओ-एं बश्कार होए दे संघर्ष विराम दे समझौते दी कोई आखरी तरीक नेई ऐ ते ओह समझौता अजे बी लागू ऐ। जंदी 12 मई गी दौनें मुल्खें, बन्ने पर गोलाबारी नेई करने, बन्ने पर सैनिकें दी गिनतरी घटाने ते बन्ने ते अगेत्रे इलाकें च रमानदारी ते स्थिरता बरकरार रक्खने पर सैहमति जाह कीती ही।

<><><><><><>

ISRO

भारतीय अंतरिक्ष अनुसंधान संगठन-इसरो नै उस घटना दी जांच लेई इक समिति खडेरी दी ऐ जेदे च पी.एस.एल.वी राकेट आई.ओ.एस-09 अपनी कक्षा च स्थापित नेई होई सकेआ। इसरो दे अध्यक्ष वी नारायण होरें आखेआ ऐ जे इस समिति नै राकेट दी स्थापना च खुंज होने दे कारणें दा पता लाने लेई चर्चा दे कई गेड़ लाई लैते देन। कल अपने प्रक्षेपण दे किश गै चिरै मगरा एह धुखीय उपग्रैह पीएसएलवी-सी-61 राकेट च खराबी औने दे बाद अपनी कक्षा च स्थापित नेई होई सकेआ ऐ ते समिति इस खराबी दे पिच्छे दे कारणें ते उपग्रैह दी स्थापना नेई होई सकने दिएं वजहें दा पता लाइयै अपनी रिपोर्ट पेश करोग।

<><><><><><>

IMD

मौसम विभाग नै अगले 5एं दिनें दौरान केरल, कर्नाटक, कोंकण, गोवा ते महाराष्ट्र च तेज बरखा बरने दे असार दस्से न। मैहकमे मूजब औंदे 5एं-6एं दिनें दौरान पूर्वोत्तर भारता, उपहिमालयी पच्छिम बंगाल ते सिक्किम च बी गर्जी चमकिए तेज बरखा पौने दी तवक्को ऐ। अज्जै सवां इस म्हीने दी 22 तरीक तोड़ी पच्छमी राजस्थान च लू चलने दी पेशगोई कीती गेदी ऐ जिसलै जे अज्ज उडीशा च गर्मी ते गुम्मे आहला मौसम बने दा रौहग। मैहकमा मौसम दा आखना ऐ जे अज्ज ते कल जम्मू-कश्मीर, लद्दाख, गिलगित, बाल्तिस्तान,

मजफ्फराबाद ते हिमाचल प्रदेश दे किश हिस्सें च अंधी झक्खड़, बिजली कड़कने ते हल्के कोला दरम्याने दर्जे दी बरखा बरने दे असार न।

<><><><><><>

NCC-Mount Everest

राश्ट्रीय कैडेट कोर-एनसीसी दे अभियान दल नै दुनिया दी सब्भनें शा उच्ची पहाड़ी किंगर माउंट एवरेस्ट पर कामयाबी कन्ने चढ़ाई करियै इक महत्वपूर्ण उपलब्धि हासल करी लैती ऐ इस दल च एनससीसी दे 10 कैडेट, 4 अफसर, 2 जूनियर कमिश्नड अफसर, इक बालिक कैडेट ट्रेनर ते 10 गैर कमिश्नड अफसर शामिल हे। दल च शामिल 10 कैडेटें चा 5 मुड़ेते 5 गै कुड़ियां शामिल हियां। इस अभियान गी रक्षा मंत्री राजनाथ सिंह होरें 3 अप्रैल गी नमी दिल्ली थमां झंडी दस्सियै विदेआ कीता हा। इस दल च शामिल कैडेटें दी औसतन उम्र 19 बरे ही।

<><><><><><>

Trump-Russia

अमरीका दे राष्ट्रपति डोनाल्ड ट्रम्प होर रूस ते यूक्रेन बश्कार युद्ध गी खत्म करने दे प्रयास गितै रूस दे राष्ट्रपति व्लादिमीर पुतिन, यूक्रेन दे राष्ट्रपति व्लादिमीर जलेंसकी ते कई नाटो मुखें दे लीडरें कन्ने बक्ख-बक्ख गल्लबात करडन। इक सोशल मीडिया पोस्ट च श्री ट्रम्प होरें आखेआ जे गल्लबात दा मबसद खूनी संघर्ष गी रोकना ऐ जेदे कारण हर हफते 5 जहार थमां बद्द रूसी ते यूक्रेनी सैनिक मारे जा'रदे न। Kremlin प्रवक्ता Dmirty Peskov होरें तस्दीक

कीती ऐ जे राष्ट्रपति पुतिन ते राष्ट्रपति ट्रम्प हुंदे बश्कार टेलीफोन पर गल्लबात दी तैयार कीती जा'रदी ऐ।

<><><><><><>

Putin-Statement

रूस दे राशअ्रपति व्लादिमीर पुतिन होरें आखेआ ऐ कि यूक्रेन च अपना अभियान चलाने ते अपने घोषित कीते गेदे लक्ष्यें गी हासल करने लेई रूस कश सुददी फौजी ताकत ते समर्थ ऐ। रूस दे सरकारी टी.वी चैनल कन्नै इक इंटरव्यू च पुतिन होरें आखेआ कि रूस गी एटमी थेआरें दा इस्तेमाल करने दी गलती करने गितें मजबूर करने दे कई जत्न कीते गे-पर रूस नै समझदारी दा मजायरा करदे होई ऐसा किश बी नेई कीता कीजे रूस कश ऐसे थेआरें दा सहारा लैते विजन अपने लक्ष्यें गी हासल करने दी पूरी छमता ऐ। उनें आखेआ जे रूस दे अभियान दे उद्देश्यें च संघर्ष दे मुंडले कारणें दा नबेड़ा करना ते टिकाऊ रमानदारी लेई साजगार हालात तैयार करना शामिल ऐ।

<><><><><><>

IMF-Pak

अंतरराश्ट्री माली फंड नै पाकिस्तान दे माली सहायता प्रोग्राम गी जारी करने थमां पैहले 11 नमीं शर्ता लागू कीतियां न ते उसी भारत कन्नै तनोतनी कारण माली योजना दे लक्ष्यें गी नुकसान होने बारै सौहगा कीता ऐ। मीडिया रिपोर्ट मूजब आई.एम.एफ नै पाकिस्तान उप्पर 11 नमियां शर्ता लाइयां न जेदे कन्नै

कुल शर्तां 50 तोड़ी पुज्जी गेइयां न। नमीं शर्ते च 17.6 ट्रिलियन रपे दे बजट गी संसदीय मंजूरी, बिजली बिल उप्पर सरचार्ज च बाददा ते 3 बरें सवां परानी गड्डिं दे आयात उप्पर बंदश गी हटाना शामिल ऐ।

<><><><><><>

IPL

आई.पी.एल क्रिकेट च गुजरात टाइटन्स नै जंदी रातीं दिल्ली कैपिटल्स गी 10एं विकेटें कन्नै हराई दिता। दिल्ली आसेआ दिते गेदे 200 रन्जें दे लक्ष्य गी गुजरात दे सलामी तोड़ी शुभमन गिल ते साई सुदर्शन नै असानी कन्नै हासल करी लैता। अज्ज लखनऊ दे भारत रत्न श्री अटल बिहारी बाजपेई एकाना स्टेडियम च लखनऊ सुपर जायंट्स ते सनराइजर्स हैदराबाद दा मुकाबला होग।

<><><><><><>

Football

दक्खन एशियाई फुटबाल संघ प्रतियोगिता च भारत नै अंडर-19 दे इक रोमांचक मुकाबले च बांगलादेश गी पनेलटी शूटआउट च 4-3 कन्नै हराइयै खिताब जिती लैता। तय समें तोड़ी दौनें टीमां 1-1 कन्नै बराबरी पर रेइयां जेदे कारण मैच दा फैसला पनेलटी शूटआउट राएं कीता गेआ जेदे च भारत नै बंगलादेश गी 4-3 कन्नै हराइयै प्रतियोगिता जिती लैती।

<><><><><><>